

本朝分省人物考

人物考卷之一百二目錄

山西

汾州府
沁州

梁卞

張俱

曹興

楊智

任義

李頴

周儀

文瑞

溫廉

任良才

張翼

賈璇

田籽

任良弼

劉仲原

石瓚

嚴泰

賈繼之

劉尚義

沁州

龐清

趙彝

何冲霄

竇明

張尚忠

本朝京省人物考卷之一百二

山西汾州

梁卞

梁卞介休人梁舉子洪武中由通經儒士授本縣學訓導施教有方尤諳治體辛彥博器之薦擢御史病卒

張俟

張俟平遙人洪武丙子領鄉薦除磁州判官陞左春坊司直郎輔東宮勤於勸學防範甚嚴上聞賜以荆杖後謝政屢召不起

曹興

曹興介休人永樂進士授行人讀書過目不忘博通諸史名重天下後養病歸正騎一驢行李蕭然

楊智

楊智介休人少喪父鹽醬不入口者三年人未嘗見其嬉笑後喪母廬墓三年哀毀骨立有數兔馴擾於墓前人以爲孝感所致有司以聞正統十一年旌表孝子

任義

任義平遙人景泰元年舉人孝思純篤執喪廬墓三

年如真寧輩二縣操持端潔教民勤稼煦之如子民
立遺愛碑

李 頴

李頴平遙人天順舉人授兗州府判清介自持祈禱
輒應民作清泉詩以歌之祭酒王雲鳳亦服其廉謂
有太古之風

周 儀

周儀孝義人成化中舉人任鄆縣教諭與諸生約雞
鳴背誦書史乃雞未鳴時起衣冠而待俗作會聲妓
繁豔觀者塞途諸生無一敢延竚者則其教可知矣

陞保定府教授篤於訓迪一如鄆縣時事著陝西通志

文瑞

文瑞介休人成化進士授行人擢監察御史有廉聲按畿甸有中貴侵民田直而歸之又巡山東宣滯理枉得風憲體時齊魯亢旱親出祈禱卽降大雨官舍有妖瑞至妖滅人皆異之後陞山東按察副使節操愈勵卒于官囊笥蕭然遠近哀之

溫廉

溫廉介休人成化舉人授山東濟南府同知歷任九

年以廉能稱陞雲南尋甸軍民徵江守以禮匡俗政聲益著徵江素無城郭凡衙門公署城池皆創建焉

任良才

任良才平遙人成化進士初尹江陰陞高郵守歷任清介及謝政孝心至老不衰母病親爲嘗糞父病願以身代其教人娓娓不倦賢愚皆獲其益

張翼

張翼介休人德性耿介幼擅文名成化進士初授刑部主事歷陞甘肅巡撫時北虜匪茹翼區處有法虜遠遁西北賴以寧靜

賈璇

賈璇汾州人弘治進士初任戶部主事歷員外郎中嘗督鈔揚州羨餘盡歸之官行賑江北調度有方民獲沾實惠所全活甚衆正德初守闕乞誅逆宦劉瑾等不報出補陝西右叅議未幾爲瑾所陷而歸及瑾伏誅朝廷將大用之以目疾辭時論惜焉

田耔

田耔汾州人弘治己酉舉人知長清縣事居官鯁直一介不取其事親孝養誠至及親沒廬於墓所哀思骨立嘗有早霜殺禾獨近墓禾不傷君子以爲孝感

之應與辛彥博立爲忠孝祠祀之

任良弼

任良弼平遙人良才弟弘治進士初授翰林庶吉士
選刑科左給事中轉吏科都給事中議論風采彈劾
不避權貴陞通政抗逆瑾矯詔下獄謫戍遼陽持節
自如瑾誅復任通政名重朝野居官三十年家積琴
書而已

劉仲原

劉仲原汾州人歲貢生喪母郭氏廬墓晝夜悲號有
盜常夜叩廬求火仲原與之其盜化而爲善牧童樵

子皆識其墓爲孝子墳云

石 瓚

石瓚介休人弘治舉人授河南羅山縣令時遇流賊作亂瓚孤城獨守鏖戰月餘殺賊有功招集流民時使薄斂府太守謂羅民曰汝等天堂上百姓耶後陞山東萊州府通判以養親歸

嚴 泰

嚴泰汾州人弘治進士初任戶部主事整峻狷潔有治才不妄取予督鈔蘇州疏食飲水而已鈔關故有便民小閘後併征稅泰至罷之吳人謠曰潯墅灘頭

無濁水蘇州關上有青天後歷登州知府時入覲考
治行廉平爲東郡最然嘗以介直忤時或有造飛語
中之者泰嘆曰是尙可仕耶卽抗疏歸杜門躬耕罕
所交接服母之喪終其身不除

賈繼之

賈繼之汾州人璇子正德九年進士初任戶部主事
歷員外至郎中爲人寬厚廉謹有儀度未第時省父
楊州有遺千金求通關節者不納便告歸父曰旣來
定省何遽歸耶曰恐在此多事或負大人清訓耳及
爲郎料理錢穀一無所私以疾卒于官

劉尙義

劉尙義汾州人嘉靖初進士由行人選御史在朝稜稜有威望尋調判秦州尹朝邑兩遷松江同知督糧餉制其用不私其贏署府事革堂食費吏屬畏其介陞南京刑部郎出補四川僉事備兵西蜀兼督松茂邊餉蜀人苦匱運尙義至則設法收給軍民兩便又釐宿弊肅兵威綿上民作八頌以咏之轉陝西叅議河南副使卒于官家無餘蓄爲人純朴簡淡好讀書著栢山集四卷詩五言駸駸漢魏焉

山西

沁州

龐清

龐清武鄉人登洪武乙丑進士任監察御史嘗被召
遲赴詰之對曰送父還鄉上趣使召之至則楮鏹幾
貫蒜一連而已御注惟清後陞揚州府知府

趙葵

趙葵沁州人洪武中由太學生擢鴻臚寺序班尋陞
兵部郎中練達政務焯有才名官至通政使

何冲霄

何冲霄沁州人從父征土賊父陷於賊冲霄與其屬

劉玉力戰擒其酋長殺賊衆三十餘人父獲免歸竟以援兵不至爲賊所害聞者哀之

竇明

竇明武鄉人正德進士任給事中首疏時政四事及京營軍弊晉地荒糧諸疏俱見嘉納後出知裕州擢鳳翔府累陞陝西右布政使所至俱有政聲

張尚忠

張尚忠沁州人少失母爲祖母王氏撫育長事祖母甚謹及卒廬於墓側日夜悲號而死鄉人莫不矜念焉

終

人物考卷之一百三目錄

陝西西安府一

丘玄清

康汝楫

張統

李昶

程濟

韓永

高翔

高士文

李暹

張賢

周或

林嵩

李錫

段信

楊鼎

王恕

邢簡

姚顯

朱欽

趙謚

李錦

東思忠

張鼎

韓紹宗

雍泰

張曉

李崙

楊時暢

張鸞

劉璣

屈直

康海

馬應祥

薛敬之

張潛

尚衡

郭桂

王納誨

張璉

王承祿

徐璉

李紀

東郊

郭田

朱騁

本朝京省人物考卷之一百三

南直督學御史西浙過庭訓纂集

門人蘇松備兵副使南郡熊膏叅閱

男 過銘盤

過銘孟

過銘簞

寧國府學生員嚴弘志全訂正

陝西西安府一

丘玄清

丘玄清西安富平人洪武初遊武當常見張三丰授

以飛舉之術有司以賢才薦於朝授監察御史賜之
室力辭弗受轉太常卿每遇大祀天地時 上宿齋
宮諮以雨暘之事玄清奏對歷歷有驗 上深敬焉
公餘黃庭道德不輟於口閑則凝神坐忘一夕謂其
徒曰明日乃吾全歸之辰至期端坐而逝壽六十七
朝廷遣禮部侍郎張智諭祭還葬五龍宮黑虎澗之
上

康汝楫

康汝楫字濟川武功人洪武初以明經任縣學訓導
辟爲 燕王府長史出知安岳縣靖難後拜左侍郎

補 皇太子克盡其職卒洪熙初贈工部尚書

張 統

張統字昭季富平人自少勤學勵行初以明經舉爲東宮侍書才敏識博 懿文太子甚器重之洪武十二年陞通政司左叅議尋爲雲南右叅政進左布政使統在雲南最久夷民心孚遠近安之凡土地貢賦法令條格祀神壇祠公署廨宇與夫上下典儀公用程度皆出統裁定是時雲南多中國衣冠流徙統與諸名士王景董倫輩定交而厚卹之其他在管內者不問識與不識皆若親舊以故遷謫至者如歸二十

三年入覲 上嘉其能賜以 璽書且勞之曰張統
來朝不待考而朕知其功出天下十二牧之首復賜
宴及道里費令還治旋拜吏部尚書去官之日滇人
思慕如失父母建文初年旁求四方隱逸鱗集闕下
悉委統臨試之統識鑒精朗振抑拔淹量才授任各
適其宜大著時譽會修 太祖實錄被旨試翰林之
與編纂者考第高下時楊士奇以教官徵入統讀其
試策獨喜曰明達時務材堪大任不但文詞之工也
以爲第一奏授王府審理士奇由是著名壬午六月
靖難兵至京討奸黨統與焉 太宗以統久事 皇

考習知典故釋不問統自經于部院之後堂所著有
鷄庵集

李昶

李昶字文燁涇陽人自少敦厚穎敏刻志問學洪武
丙子由鄉薦入太學擢左軍都事有能聲尋陞戶部
郎中績用茂著永樂初肇建北京以薦特陞行部右
侍郎昶協心經畫事無廢弛壬寅轉戶部侍郎凡國
之儲蓄民之貢輸以至賦稅損增金帛出納皆調度
有方規畫有法及扈從北征董運糧餉士馬足用而
無匱乏之虞宣德五年陞戶部尚書賜以寶帶且命

專督收支方有條緒而大命及之計聞賜祭葬如例

程 濟

程濟朝邑人有法術洪武末以明經爲四川岳池縣教諭岳池去朝邑數千里濟寢食俱在朝邑而日治岳池學事不廢革除間上書言某月某日西北方兵起朝廷以爲非所宜言繫至京召入將殺之叩頭曰陛下幸納臣至期而無兵臣死未晚也遂詔繫獄已而兵果起乃赦出尋以爲軍師護諸將北行戰於徐州大捷會曹國公師退 文皇帝至江上濟逃去不知所終始徐州捷時諸將樹碑載戰伐次第及統軍

者姓名濟一夜往祭其碑人莫測其故後文皇帝
過徐州望見碑顧左右曰碑者何也或以狀對上
大怒趣左右毀碑一再擊遽曰止爲我錄碑文來乃
按碑族誅諸無得脫者濟姓名正在擊處得免向者
之祭蓋禳之也

韓永

韓永西安人建文間爲兵科給事中永豐軀幹美鬚
髯音吐弘朗每慷慨論兵事建文君喜之壬午六月
北師克都城永與陳迪卓敬戴德彝等同以奸黨逮
至欲官永對曰吾王蠲耳奚以官爲不屈死之

高翔

高翔朝邑人有文學節行洪武中以明經徵爲監察御史高皇帝甚眷注之所論奏無不關國家機事當上心者成祖在燕邸宿聞翔名及卽位召將大用之翔持喪服入見慟哭聲震於殿陛語多不遜乃殺之沒入其產令諸高氏產皆倍其稅曰使世世詬罵高御史也其親戚悉配爲軍又發其先墓雜犬馬骨焚灰揚之而以其地爲漏澤園

高士文

高士文咸陽人質直剛果善騎射洪武末從平內難

出入戰陣累陞前軍都督僉事征交趾多効勞勩取
廣源州與賊力戰而死追封建平伯

李暹

李暹字賓暘長安人生而豐偉成童端重如成人及
就外傳卽知嚮學守禮祁寒甚暑未嘗求便居近闌
闌未嘗入茶酒肆甫冠入鄉校祇事先生長者日留
心經史洪武己卯領鄉薦入太學友天下英杰日詣
高明永樂癸未授北京行部戶曹主事十年以事左
遷苑馬寺清河監副以薦使西域凡五徃返不辱國
命每回朝輒蒙恩賜宣德初大臣以公正廉能薦提

督京倉正統初擢通政使母憂去任以孝聞服闋還
職兼理通州直沽倉及象馬草芻歷陞侍郎筮仕戶
曹及調戶部文移精核會稽明白受知於大司徒嘗
稱其公勤明慎以勵司屬在清河監上言更牧地爲
法司所核嚴法鞫之終不易辭卒如所言孳牧有效
提督京倉夙夜在公未嘗以風雪寒暑少懈嚴以制
下不容請託官屬敬憚不敢爲欺弊於是輸粟者無
留難受廩者皆精完蒙其惠者以得瞻威望爲喜年
七十方欲請老章未上會陝右討議軍儲屯田久無
實效特命之經理受命之日躍然自喜促期而行忽

邁疾遂不救疾革連呼曰糧儲糧儲無一言及家事
訃聞詔遣禮官諭祭命有司營葬

張賢

張賢鄆縣人永樂中鄉舉授吏部司務遷驗封司郎
中超拜山西右布政使致仕性鯁直居官應物一以
誠篤爲本其清苦尤人所難

周彧

周彧朝邑人永樂中以明經徵爲給事中陞通政使
彧剛直敢言有論劾必着緋衣諸大臣每早使人候
彧長安門外見彧緋衣各令取素衣角帶爲待罪具

當視朝果有論紕紕者必得罪久之貴近多忌或有
譖或貪者 上怒或下獄死命籍其家惟襲布斗粟
而已召或妻問曰縱或廉無俸金耶妻曰或俸金寄
通政司庫已而司上或庫金 上悟立誅譖者以金
給或家命喪所過致祭復其官

林 嵩

林嵩邠州人國子生任監察御史 成祖渡江言事
忤旨謫戍廣西交趾叛以嵩往征之事平授交州府
同知秩滿改河間府陞戶部郎中江西叅政入見乞
致仕許之未幾交人復叛有詔起用比至卒

李錫

李錫字天祿咸寧人永樂戊子中陝西解首明年會試禮部中乙榜授蒲州學正己亥九載滿獻績來朝陞行在吏科給事中壬寅丁父憂洪熙改元冬制終轉禮科宣德辛亥遷右通議乙卯陞右通政正統癸亥轉左通政甲子陞通政使景泰壬申加太子少保癸酉以風疾休政歸錫自幼穎敏過人見者奇之旣長爲弟子員苦志勤力昕夕匪懈不事浮華不近聲色爲學正時毅然以師道自居凡敎人立心制行皆以身先之故出其門者成器而足用爲黃門時整飭

典雅小心縝密得近臣體在通政時封駁章奏通達下情雖倥偬繁劇而井井有條無壅滯之弊又不以苛察爲明卓有大臣德量以至閑家應世無一不得其宜入官四十餘年歷事五朝初無小過可紀身榮存歿令德考終福祚亦云醇備矣

段信

段信字宗貫三原人穎悟有氣節正統丙辰進士歷任監察御史尋陞右僉都御史守紫荆關北虜入寇落職移守倒馬關極力捍禦邊境賴寧上嘉其功起大理左寺丞卒于官

楊鼎

楊鼎字宗器咸寧縣人正統己未會試第一廷試進士及第授翰林院編修詔簡講讀以下有才器者十人進學東閣鼎居其一修五倫書預校勘十四年北虜犯順命慎選諸司有治才者分守要地鼎改御史蒞兗州振勵有法事平復舊職陞侍讀兼左春坊左中允同考禮部會試尋陞戶部右侍郎天順改元陞左侍郎中贊牛玉諭旨欲轉江南折糧銀入實內帑而以他物充武職俸鼎從容開諭乃已牛馬羊房草缺議欲徵什二鼎俱以民艱沮之成化戊子陞尚書

延綏用兵欲預徵邊餉鼎言黃河漢唐漕運故道其間雖稍險然三門而上小河可達延綏者尚在苟貯糧水次遡流徐運何所不濟疏上且請身督之竟齟于議不果進太子少保居數年因言者乞致仕許之降勅給驛舟仍給月廩歲夫終其身卒年七十七贈太子太保謚莊敏賜祭葬鼎雋異不羣清修苦學善談論初試禮部不第例入監聞南監學規整肅獨請就之大爲祭酒陳敬宗所敬禮在翰林迥然自異於人及遷戶部掌國計最久然性頗執泥不盡合於時宜前後僚屬多不厭服云子五人時暢亦登進士爲

翰林院檢討時敷領鄉薦爲兵部司務

王恕

王恕字宗貫三原縣人生而魁偉高岸音吐如鐘見者異之正統壬戌登進士選爲庶吉士授大理寺評事歷左寺副操履剛正人不敢干以私於奏當之成原情比律犁然當人心未幾陞揚州府知府屢辯疑獄歲饑發廩不俟報且給醫藥多所全活作資政書院教郡子弟科不乏人天順間遷江西右布政使比至磊落洞達遇事敢爲苟有便於民者毅然主之無少顧忌而操履皦然不入義外一錢久之轉河南左

布政使成化元年陞右副都御史撫治南陽時南陽
豪爭礦殺人恕獲其渠魁餘悉解散以內艱去會襄
陽盜起 詔恕起復會兵搗其巢走之及劉千斤輩
作亂恕亦會王師平之遂 勅巡撫河南進左副都
御史風采凜凜有所興革兵民甚宜丁憂起刑部左
侍郎總理河道恕躬視上下僉稽衆論具奏揚州一
帶河道南臨大江北抵長淮別無泉源止藉高郵邵
伯等湖所積雨水接濟湖面而河身比之湖身頗高
每遇乾旱則河輒淺澁不能行舟若將河身濬深三
尺遇旱亦可不阻又於高郵湖自杭家嘴至張家溝

南北三十餘里濬深三尺濶十二丈取以爲外堤就將內堤原有減水閘三座改作通水橋洞接引湖水以內行船仍於外堤造減水閘三座以接水利雖遇風濤亦無覆溺疏入允行之九年改南京戶部左侍郎十二年會雲南夷獠爲梗改左副都御史巡撫其地時鎮守內官私市外夷誅求無厭恕劾之其下郭英懼而自盡沒其寶石於官并械送數人於京且勸上不寶異物凡花木禽獸寶玩宜一切拒絕有駕帖下郎中鍾蕃所恕言舊例駕帖下諸司司禮監印刑科號 皇門諸司關防今皆無之何以爲信設駕

帖有 賜死者其人將何如又言昔交趾鎮守非人
致一方陷沒騰衝啓釁致麓賊叛逆今日之事殆有
甚焉在雲南九閱月疏二十上由是直聲動天下進
都察院右都御史十三年改南京都察院叅贊軍務
進兵部尚書同事者忌之改巡撫南直恕以近年貢
獻太多所在騷擾中官王敬乘傳東南搜索竒玩所
至驚懼恕言當此凶歲謂宜遣使賑濟而乃橫求玩
好令其失人心損國體傷和氣而召災沴乎 上詔
械敬下獄同惡王臣斬於市中外稱快謂恕有回天
之力壬寅松江大饑斗米百錢恕出粟減價以糶全

活甚衆仍轉南京兵部尚書叅贊機務刑部員外郎
林俊以諫下獄經歷張黻救之亦下獄恕言二人志
在進忠而得罪恐人自此以言爲諱設有奸邪誤國
誰復爲 朝廷言者俄有 旨令致仕恕怡然就道
會星變庶吉士鄒智等抗論萬安劉吉天下之小人
王恕彭韶天下之君子乞黜萬安劉吉而用王恕彭
韶疏入不報時 孝宗在東宮素聞恕名及卽位太
監懷恩以忠直起自謫所首奏恕於 上言官又交
章首薦遂 召爲吏部尚書劉吉深銜之及恕在吏
部裁抑僥倖褒獎名節甄拔淹滯中貴無敢以私干

吉代萬安專政每有所軒輊恕亦憫憫不撓守備蔣琮與南京科道相訐秦吉票給事中方向等貶謫殆盡琮自如恕言官中府中俱爲一體陟罰臧否不宜異同壽州知州劉槩考滿來京與御史楊鼎議時政槩與鼎言夢一人騎牛背上陷澤中公左手把五色石子右手提牛角引入正路其人謝而去蓋人騎牛背正我朝姓名惟五色石子不可曉意者公首抗疏論時政爲彈之第一義耶鼎嘗劾內閣附內閣者發其事下獄鼎以受槩餽遺誹謗朝政發衛充軍槩比擬造妖言者律罪至死恕上言槩之書詞固爲狂妄

其夢有無亦未可知然初無惑衆亂民之心今使繫
死於獄中豈不大傷天和也哉卒得減死又徼王乞
陞鈞州爲府與夫工完乞恩濫賞內官監力論止之
兩廣都御史秦紘奏安遠侯柳景不法事坐致仕恕
極言柳景當追賊 聖恩免之矣而恩不及於秦紘
是爲地方軍民之害者可恕而除地方軍民之害者
不可用其何將以服人心而勵將來乃起爲戶部尚
書同 旨以通政司經歷高祿爲本司叅議上言祿
出自科目自可遠到越次超陞恐非所以愛之唯勿
以親戚妨公議事乃止時有建白多謂業已行矣恕

蓋天下事設未得其當雖十易之不爲害若謂已行無及則古之納諫如流豈皆未行乎遇事輒言有不合卽引疾求退 上每溫詔留之但執政擠忌日深明示沮抑恕以不得其職屢疏辯明求退及吉去位執政丘濬又不悅之恕不自安求去益力始准致仕言者譁然屢奏起之不果恕歸優游山林著述不輟以正德二年卒贈太師謚端毅子承裕爲戶部侍郎

邢簡

邢簡字居敬咸寧縣人少力學有志尚登正統壬戌進士第授刑部主事擢真定府真定畿內劇郡

番漢官軍雜處勲戚豪右占據民田讎訟紛沓簡處
之有道上下安之以薦陞浙江左叅政尋轉順天府
府尹京邑供億繁重簡力爲裁省十去五六陞南京
大理寺卿尋徵拜戶部侍郎端午侍駕閱武于萬
歲山之陽忽疾作急扶歸抵家而卒簡爲人廉介有
守蒞政彊明與人交坦然無矯言飾行卒之日囊無
餘資惜之者無間言

姚顯

姚顯字微之咸陽人正統甲子鄉舉卒業太學時上
疏言王振竭生民膏血修大興隆寺極爲壯麗車駕

不時臨幸夫佛本夷狄之人信之得禍若梁武帝者
足爲前轍之鑒請自後內臣修葺寺院悉行拆毀以
備倉廩之用勿復興作爲萬世法不報後至太僕丞

宋 欽

宋欽字克敬乾州人正統十年進士授大理寺評事
歷陞福建按察司僉事四川副使征大埧賊有功受
織衣銀牌之賜轉河南按察使尋擢右僉都御史巡
撫貴州陞南京大理寺卿累疏乞致仕許之加資政
大夫尋卒贈刑部尚書賜祭葬如例欽居官以廉慎
稱精于法比乞休疏凡十餘上始終之際有可觀者

趙 謚

趙謚字子安號真齋涇陽人正統甲子鄉舉第一人
景泰辛未進士授南京戶部主事陞員外郎母服闋
轉兵部未幾有江西之擢在戶部時兵儲告乏勅謚
往督至則飛章劾少司徒及中貴人專恣罪不少徇
又徽州積有逋租官嚴刑莫能徵往諭以禮法民立
輸無敢後者在江西守法奉公行郡縣不憚寒暑險
途未嘗敢以私謁性甚孝友母太安人王氏計聞號
病幾絕廬墓側淡食草寢者八載旦夕哭奠哀如初
喪常有慈烏飛遶其傍不去盜旣得其家貲後因感

卷之三
張忠
悟悉歸之且皆改行焉有司以聞詔旌異之曰員外
郎趙謚孝行之門兄弟以父母俱棄圖分異謚泣止
之不能則盡以所遺貲產讓之從兄子二人貧不能
爲室代爲之聘歲薦饑鄉多婚葬失時者竭力濟之
無慮四五十人封治母墓側荒塚亦十七八所成化
六年卒壽五十有八官凜貞介里播仁聲卓然盛世
之名人云

李錦

李錦字在中號介庵咸寧人九歲失恃依安成舅氏
爲釋師教之端坐終日不逐羣兒嬉戲讀書已知大

義還爲諸生受易於董生益肆力於學後遇秦州周
廷芳講學得聞周程張朱爲學之要遂棄記誦辭章
之習專以主教窮理爲事又與西郭姚氏渭南薛氏
龐澤講習善則相告過則相規知行並進久之踐履
益醇關中學者咸敬服如宋人之於橫渠云登天順
壬午鄉舉入太學爲邢祭酒讓所重令諸子受學諸
子稍不恭輒遣去後邢坐事下獄錦率衆抗章明其
無罪事親色養執喪盡禮不作佛事士大夫家至今
遵行風俗爲之一變所居僅蔽風雨茹淡服䟽至於
屢空臨財終無苟取周先生嘗難之曰有人親病劇

思食一梨求諸市不得隣人有種者非竊不獲將竊之乎錦曰辱身以及其親非孝也周歎曰在中可謂立身頗揚者矣其解經極平正通達不爲鑿說且善誘後學諄諄忘倦出其門者多名士及任松江府同知職親戎牒奸無所售有脫役四十載者卽令補伍乃爲官守所拘不究厥施卒於官骸骨不能歸其僚友賻之乃得歸云

東思忠

東思忠字廷伯華州人生而岐嶷少而穎悟十二遊太學每祀則齋潔入廟凡俎豆樂舞之屬莫不備問

而具識之退而曰禮云樂云固如此其所用心豈尋常能測哉讀書爲文雖長老莫不畏避弱冠遴爲州學生中天順壬午鄉試成化丙戌登進士拜刑部河南司主事剖斷明決不避權要尋轉雲南司員外郎郎中被命審錄畿內刑獄平反爲多惡有所畏冤有所白居刑部以端正自居因情亮事曾未一用慘酷刑具而犯者自不能不以隱曲備對嘗曰獄有微旨非敲朴所能致也每於招稿面題曰得情勿喜及據案正法則又曰罪疑惟輕一時危疑之獄皆就決焉兩擢府丞不報遂轉四川按察司副使整飭松潘

兵備璽書凡一切畚賊出沒軍民利病悉聽從便處
置至則立約束謹烽燧內修政事外樹兵威諸畚部
落畏威懷德不敢侵邊然松潘孤寓萬山而諸畚部
曲環列蜩螭中留一綫之路爲轉輸往來斗米之價
每至數金方辦故輒數倍他邊而主藏之吏多伸縮
監司又因循罔稽由是吏奸民苦日甚一日於是苦
心勞慮滌弊正法倉庾之積陳陳相因矣又嚴減尅
之禁正私鬻之罰茶馬有序瑕釁不生士有飽食官
息科斂兵士駸駸生氣焉又於大石佛嘴鑿山開路
以便轉輸人至今宜之成化甲辰惡族逆命出軍勦

之直抵巢穴斬首四十餘級上賜白金綵幣乙巳
小寨番竊發又出軍勦之斬首三十餘級所獲軍器
頭畜無算曰此士卒之功也悉以賞之捷聞又賜
如前於是軍威大振諸部矢心歸順其酋長及朔望
輒來稟受約束蜀中士民倚爲西北長城矣是歲十
有一月以疾卒於官享年纔四十五爾惜哉

張鼎

張鼎字大器咸寧人成化二年進士授刑部主事歷
員外郎知太原府山西叅政河南按察使都察院右
僉都御史巡撫保定等府召爲戶部右侍郎以疾乞

歸卒訃聞賜祭葬如例鼎幼受業於河東薛文清公
有理學名知太原有惠政民懷之至巡撫保定則令
各府沿路築牆以禦盜賊衝突修繕煩勞民頗怨謗
然至今旅人賴之爲永利焉

韓紹宗

韓紹宗字裕後號蓮峰西安府朝邑縣人成化五年
進士授刑部主事歷員外郎中九年持法惟謹一無
所徇都指揮王章守備真定橫甚御史柯忠劾奏章
章亦誣奏御史 詔往勘而章有內援請託紛至竟
按其罪免官大璫石巖鎮守大同與都御史許進相

奏命給事同紹宗往勘紹宗廉其實力直都御史
嚴深嫉之奏言紹宗黨都御史 天子震怒逮繫獄
久之事白得釋宗師有僧善中貴梁昉稱曰門僧一
日出而衝定襄伯前導市撻之僧倚昉奏誣定襄下
于獄自匿昉所紹宗竟追捕寘于法一時京師有不
畏科道而畏韓郎中者以紹宗之剛正無愆故也遷
福建副使凡七年郡邑吏以法問罷及所聽斷平反
者不可殫紀會以內艱歸遂卒

雍泰

雍泰字世隆咸寧人成化五年進士授吳縣知縣吳

濱湖湖漲淪田千頃作堤障之民受其利稱雍公堤
吳民有妾亡者妾父訟其夫密殺吾女兩月匿屍湖
中石下召訊夫夫曰妾逃兩月踪跡不可得妾父脅
財始知死所使人視其屍乃訊父曰夫密殺汝女汝
安知匿於石下此又豈兩月屍耶此必非汝女汝殺
他人女冀得賂耳一訊而服十年召爲監察御史吳
人富而好饋行泰不受一錢巡鹽兩淮淮竈丁貧而
鰥者幾二千人巡滿俱與完室歷陞浙江右布政使
時勢家鬻販私鹽鄉人效尤幾至千輩盜竊橫行乃
先收勢家人抵罪於是羣盜悉平爲都御史巡撫宣

府叅將李稽不法部下狀其惡具草且聞稽跪堂下乞受責圖自新泰曰此亦軍法也縛下杖之三軍股栗稽乃譖之於朝稽爲時相李東陽姪也言官遂劾泰以擅辱將官罷退居韋曲別墅不涉城市正德二年給事中潘鐸薦泰有敢死之節克亂之才詔起左副都御史操江固辭弗允未幾陞南京戶部尚書時逆瑾用事以泰鄉人欲親暱之卒不應遂斥去仍罰米千石輸宣府而諸所嘗薦者鈞陽靈寶皆獲罪歸復居韋曲日焚香讀書與鄉人論穡事不與上官相見族黨有犯必告有司曰某是某非幸無以泰故屈

法年八十卒

張曉

張曉字光曙三原人成化己丑進士知襄垣縣政平訟理召拜監察御史上書論萬貴妃事同列讀其辭皆縮舌上笞而釋之出爲湖廣僉事施州夷亂諸僚莫敢往曉請行曰此不可以兵加當以義動至則宣朝廷威德諸夷感服陞河南副使時河決黃陵岡泛汴宋曉奉命督役導河幾千里俾復故道工竣勞以幣鑑進按察使陳州有告歐死少年者三年莫能決曉閱屍圖驚曰安有少年而缺其齒乎訊之果捕

得少年其屍乃一乞嫗也事遂白人稱神明尋以屍歸

李 崧

李崧字世瞻別號靜庵臨潼人生有穎資年十八補郡庠生大爲郡守余肅敏公所重嘗贈以詩有曾向關中試白眉之句中成化乙酉鄉試已丑進士初除山西屯留知縣屯留難治在積滑舞文弄法上欺官府下虐良善十數年來獄訟錢糧皆出其手至則先按其奸弊得十餘人悉捶死之而縣治始清法令不擾強良畏如神明良善親如父母在縣三年一毫不

取廉名四振至興學校修禮樂正風俗時婚娶治行
爲天下第一陞戶部河南司主事轉山西司員外郎
郎中在部十二年除積弊革奸猾錢穀出納一毫不
爽一時居部者無出其右名動京師陞廬州府知府
治廬州如治屯留而法令稍寬詞訟兵甲錢穀無不
克舉賑荒救饑所活萬餘人民不憂旱蝗不入境立
俵馬之法定鹽鈔之價創河橋以免民溺廣積穀以
備賑貸撫按交薦聲譽赫然陞河南左叅政去任之
日百姓遮道泣留立碑頌德甲寅丁外艱服闋除山
東右叅政未及任丁繼母憂服闋將起而病作不起

矢崙貌不踰中人至判大事決大疑嶽峙峽流沛乎
有一介不取之廉萬方無敵之勇朝野之人咸想望
其丰采焉

楊時暢

楊時暢字知休咸寧縣人尚書鼎之子也成化戊戌
進士改翰林院庶吉士授檢討弘治初與修憲廟
實錄書成陞修撰未幾充經筵講官同考禮部會試
詔選東宮官屬吏部尚書馬文升以時暢薦改右
春坊右贊善秩滿陞左春坊左諭德典成再遷侍講
學士正德改元以東宮講讀恩陞太常寺少卿仍

廉侍講學士尋卒時暢美風儀善談論居家以孝友聞爲大臣子多識國朝典故及前輩遺事有幹濟才未及用而卒

張鸞

張鸞字應祥咸寧人也舉成化戊子鄉試辛丑舉進士爲大名知縣是時縣中百物俱廢倉廩空虛奸豪侮法又衛河每漲而瀕水諸田盡爲之沒百姓患苦之至則修墜補敝誅鋤豪強積穀備凶幾萬石築堤捍水不害耕作詞訟清理遠近稱爲廉平時寧山衛胡指揮者妾妬甚家人疾之胡死其子誣其妾毒之

獄成鸞訊得其情妾以無死先是都御史侶鍾調鸞
令南樂大名民伏闕奏留得不調至是銓部竟調之
而南樂歲旱民饑流亾過半乃請于都御史得二千
金請于大名府得六百金又請于賑濟郎中得穀若
千石設法賑貸民以獲蘇矣而後崇道興化培養茂
異綜理其馬政馬政修舉三載考績徵拜山西道御
史權稅通州尋視茂陵役徒丁繼母喪歸復其官巡
視居庸諸關從容言便宜事謂軍士糧餉于他處守
支不便而傳警缺馬皆非養士禦患之宜條議部置
咸當事機疏上隨下戶兵二部議報可及代復督稅

通濟白河無何出按四川務持大體不矯激立名簡廉貪而激揚之人人當于功實而又裁省浮費飭理兵戎修繕城池興作庠序表章忠節推舉隱逸先後奏議以松潘諸處及成都諸郡縣何地宜添設何員宜裁革卓然皆爲經遠之績焉歸而總憲屠公瀟委以掌諸道奏事戊午冬清寧宮災奏上八事其一曰法司修纂條例宜早完輯以省刑罰二曰言事諸臣宜優容以開廣言路三曰巡撫都御史宜量材授任邊陲與內郡異未可一槩推予四曰濫放俸金五曰優恤小民六曰明慎用刑七曰行取差官八曰量減

抽分 敬皇帝爲罷行之陞浙江按察副使巡視海道經畫六年百務具舉倭寇遠遁海道肅清超遷大理寺右少卿時鎮守河南劉太監與周王訐奏諸不法事奉 詔案問具得其事以報犒寶鈔羊酒尋轉左少卿陞左僉都御史理院事御史王公時中巡按大同忤權貴人怒欲置之死力解救之巨璫張璿掠奪民產反奏言豐潤皇莊累苦百姓侵漁往勘事得直田產還之民轉右副都御史仍理院事尋復拜大理寺卿得侍經筵與修資治通鑑成得賜 御製寫懷迴文諸詩復轉刑部左侍郎曩在大理時會案牘

委積一切皆自理積勞傷目至是疾愈甚竟以失明
乞骸骨歸田不許久之以事忤瑾得致仕歸旣歸而
瑾怒不止罰米二百石輸于邊于是杜門蔬食以儉
爲師晚好杜甫詩命兒子吟誦其側日聽以自娛辛
未秋病目復明又九年而已卯夏終于正寢詎生壽
七十有四訃聞 天子諭祭命有司營葬事

劉璣

劉璣字用齊號近山咸寧人爲兒時游鄉塾卽端重
不嬉戲塾師異之曰是兒骨相不凡後當名世戴恭
簡公督學見其文特器之以補諸生成化庚子舉鄉

試第二人明年登進士授山西曲沃知縣至則砥苦
節敦古道期年邑人向化曲沃產棗視事多以棗贖
罪遂儲棗數萬計後歲大侵賑粟不繼卽繼以棗民
賴不饑民有共貲而掊利者訟于邑璣曰汝聞管鮑
分金事乎訟者慚乃委金願輸官爲平遣之其專務
德化不尚法令類此他若疏夢泉均景水寬刑罰平
差遣廣儲蓄恤災獨諸善政不可縷紀是時曲沃治
行爲天下最入爲戶部主事未幾督餉大同道過曲
沃人聞其來扶老攜幼迎謁道左留邑數日而去戊
午陞江西瑞州府知府瑞故曠郡無城郭依山聚居

民狂悍善劫郡人苦之璣視郡首著勸諭文繪善惡圖標揭境內賊黨稍稍解散賊周黨狂悖率兵撫禦之賊奄至擁歸其寨旣乃召其魁諭以禍福賊乃羅拜堂下已乃治具享璣蓐食酣飲夜就寢坦腹睡斲斲賊衆環聽相語曰劉公大人也我輩不復敢爲惡矣居三日乃還郡境內寧謐遂興學正俗表節崇讓均賦薄稅節用省刑期年瑞乃大治辛酉朝覲量移九江府瑞民思其惠愛立三太守祠至九江僅踰月丁母夫人憂歸是時虎谷王公督學陝西倡明道學延居止學書院講諭性理三秦學士翕然宗之甲子

復除湖廣衡州府知府衡薦饑適疫作下車禱神修
祀施藥賑食孜孜若不及民賴以存時過石鼓書院
爲諸生談說經史及性理諸書衡士喜曰我輩今日
復從朱張游矣正德丁卯雍王薨於衡 朝廷遣太
監護喪還京師時劉瑾用事閹人怙勢掠賄至衡見
璣首以禍言恐動繼卽大需供億時時戒曰王柩某
日行舟及楫師挽夫諸所供給其宿具且無煩民否
則罪不貸璣唯唯至期舟備篙師良挽夫健且濫其
數人各負米鹽槁魚備需於湘潁吏人唱名執役無
煩呼促中貴黃異之以問役人對曰府官聞貴人來

業已先三月儲之矣黃曰幹事愛民若此耶真賢太
守也戒僕從毋需索黃至京覲劉瑾首以璣治衡善
政對時瑾用人多以賄遷臺諫恒以爲言旣聞黃之
言乃獨用璣以塞羣議遂擢太僕寺少卿去衡衡人
德之樹棹楔表遺愛云明年戊辰陞太常寺卿提督
四夷館無何陞戶部左侍郎卽又陞尚書屢疏懇辭
曰臣由知府轉少卿已爲殊遷由少卿數月而陞卿
由卿而累遷尚書 祖宗任官確有定式今若此是
使成憲由臣而毀 陛下縱眷臣其如祖宗之法何
臣死不敢就疏屢上不允乃赴部視事尋以例侍經

進賜楮鑑千貫尋又賜玉帶并御製諸詩十六幅貞
觀政要六部瑾方擢用時意必德已及璣至素節自
守意稍悔之然以人望所屬必欲引以自飾而乃益
自韜晦每朝退署部畢卽閉門縱飲酣卧不醒瑾欲
延問率醉不能起他日瑾勝氣詰之曰氣弱非酒不
能支且嗜睡不睡則病由是益疎遠矣瑾性好紛更
璣於部事遵舊不易瑾殊不悅嘗力論時宜變更璣
曰祖宗立法盡美盡善行之萬世無弊亦惟不愆
不忌率由舊章而已是時瑾急賄自封巧宦者多重
輦以通致璣從容語瑾曰飲食以養生過則傷生貨

財亦然是故貨也者禍也古人戒積藏畏其禍也瑾積憤不附已欲改南京禮部又欲援國初例出爲布政使尋事敗不果瑾敗璣乃上疏自劾曰臣與劉瑾實同鄉里誤被引用驟遷顯官今瑾事敗臣罪當誅戮上雅知廉靜方直不爲瑾用特准致仕旣歸里無華屋野無腴田囊無羨金緼袍脫粟泊然一布衣也居鄉二十餘年耕讀自樂與人接油油然惟恐有傷而中操介削屹不可移雖不謝絕公府然卒無所干預故人益敬重之晚年恬放自適多從鄉人飲飲輒盡量醉爲歌詩皆發性情有淵明之遺意焉卒之

日雷風晦冥聞者慟悼訃聞遣官諭祭二壇有司營
葬璣爲戶部時尚未製緋袍冬月朝會公卿皆緋紵
璣獨服紗至部視事過午堂食止市餅四枚茶一盃
耳時劉瑾行賄天下諸司當朝覲入京多賚重寶以
賄當路璣獨漠然一日有人扣門餽玉珮帶適璣當
門怪問其何由以至餽者大驚踉蹌趨去曰我以爲
吏部劉宅是戶部劉宅邪又當時諸公卿過瑾所率
庭然璣獨以禮自持不少貶屈數事至今尚爲人所
稱說焉

屈直

屈直字道伸別號西溪華陰人初生之夕父夢日出
大如輪紅光異常流入于懷驚覺而生天性聰敏過
人七歲時口授以詩歌及大小學卽記憶不怠稍長
就師手不釋卷成化乙未充邑庠生浮梁戴恭簡公
深加獎譽秋遂中試甲辰登進士秋丁內艱適歲大
饑絕糧直謁推官乞賑推官以囚二人將論邊戍居
間可得厚貲直曰在使君高義則可直則進身之初
當清白自勵賑公道可受賂援罪人則不可矧又傷
使君之公哉推官嘆服丁未授刑部主事員外郎郎
中故部獄卒往往厚索要囚稍不如意輒縊殺之直

縣獄事卒白鑑縊殺一囚是夜夢囚訴卒明旦根治得狀白于尚書曰要囚也姑置之直持不可卒論如法自是卒無敢殺囚者錦衣奸人依憑權勢郡縣上賦至輒局誘代納號稱攬頭徃徃負苦解人多令破產有數攬頭發覺直白尚書按治尚書不許直固請及逮繫攬頭權勢人果邀奪之尚書聞之且以直爲歛怨生事直入朝言於錦衣曰錦衣朝廷爪牙乃不容刑官守法耶錦衣懼竟出諸犯徵其賦俱抵之罪尚書復大喜遣東巡撫與武定伯交惡直奉詔勘問直巡撫而抵武定以法權貴人憚之斂不敢恣丙辰

陞重慶知府土官軍衛雜處其地富庶謗議易生自有知府以來無見任陞遷者直旣拜命人或慮之曰盡兵在我陞遷何足較旣視事吏持簿呈請征需約可八千金直歎曰小民營利爲生何預於官而爲此橫斂耶取簿付之火府南妖擲輒石毀人房屋時有火災直齋沐告於城隍妖火遂息境內旱禾稼枯直將禱於真武山是日天甚晴明啟行忽有白雲如蓋往返隨之旣而大雨如注歲則大熟於是鄉士大夫有三異贈卷守重慶凡九年六事孔修四境安又倉庫有餘羨之積囷固無留滯之囚乙丑陞河南叅政

永城縣楊姓者爲豪族誣告得狀治豪族罪楊氏
伸正德丁卯陞浙江按察使鞫問糾治一以至公處
之非約自持門無私謁法無枉縱一方澄清司禮監
巨璫劉籍故都御史錢公鉞家未至直已陞河南布
政將之任劉璫至怒甚衆懼莫知所爲直笑而言曰
朝廷之下衙門最大者內府司禮監天子之下內臣
最尊者蟒衣玉帶太監我輩豈敢不敬第不知見怒
得何罪也劉璫卽改容曰憲長好人援直手揖衆入
坐衆謂旣不激劉怒又不瀆甚得不惡而嚴之方初
至浙巡按欲懲司吏直曰事不集大抵皆官也乞寬

三月事尚爾豈惟吏官亦當論巡按罷懲不待期而報完甫至河南陞太僕寺卿太僕寺馬利近倖相沿爲苛貨地包攬代納請託苞苴百計求中至郡縣亦歲有常例馬多不堪直力禁革之太僕爲之肅清近倖不悅乃相與共譖于權瑾瑾令邏者偵察盡得其情乃謂人曰屈某好官太僕官久習汙濁今別是一衙門也諸譖不行遷南京操江都御史復改南京大理卿多所平反未幾復改漕運都御史直以運船多稽遲置方眼簿給付運官日記所運水程及阻風守淺時日備查考其法至今用之將上京議事山陽知

縣餽銀器一卓曰舊例也直曰是河憲綱所載責知縣叱出初當道與藍田南氏有故怨直連姻南氏又爲按察時某御史爲歸安令民告其科斂至萬金按治之令懷白金三百餽求解叱却之按治益急而直陞河南令事得解及令爲御史起復赴京至淮安謁于漕府執屬官禮甚恭直喜宴談及浙事偶忘其爲某御史也因言平生未嘗苟取如浙屬一知縣餽金求解當時叱出及今猶耿耿不知其人何如也某御史色沮愈恭直怪之及罷會諦思之則某御史也遂肆意傾擠直屢疏致仕以歸直毅而有謀剛而不虐

才敏而力足以行之故宦迹所至皆有聲與人言侃侃無隱亦以此得罪於人里居以來二十年耕讀不倦省身親農事手披載籍爲子弟式雖官至大臣非慶賀大賓客未嘗衣錦於人無貴賤謙謙致禮無少慢事樸庵年九十卒直年七十哀毀皆如禮直弟泰寓京感時疾直親視湯藥家人以傳染諫曰兄弟至親豈得相避忌哉時有名醫然難致跪於門醫感而至謝禮亦不受曰公爲友愛人某獨不得爲義人耶嘉靖丁亥奉詔進階總制尚書王公疏薦起用不果年七十四一疾不起訃聞上遣官諭祭營葬

康海

康海字德涵武功人弘治初舉進士第一議者謂其
廷試策爲本朝第一本朝文章至成化末益庸靡海
既有俊才遂與何李邊王輩興起爲古文扶衰拔溺
有力焉然性豪放不閑小禮恃才凌駕人人多忌之
會劉瑾惡李夢陽海與夢陽善因往說瑾以脫夢陽
及瑾敗人遂指海爲瑾黨罷去不復用海益縱聲妓
恣游山水讀書爲文立名于時故海雖廢而名益著
彭幸庵嘗欲薦之海答書以見意曰僕自庚午蒙詔
之後卽放蕩形志雖飲酒不多而日與酩酊爲伍人

間百事一切置之蓋素性疎懶偶因官秩羈繫數年
若招豚繫鷹而一旦得此中心之快實有人所不知
而已獨知之者自東方多事以來聞其驍傲無狀如
彼卽或奮然有攘臂之意隨復自笑以爲狂奴猶爾
卽又飲酒散髮箕踞林麓此其性習之已成雖三公
之貴刀鋸之辱不可奪也况數石之粟半幅之紙乎
僕自幼支謾無狀性好是古以非今始仕時望見
先皇帝寬仁大度卽自私擬以爲臯夔稷契之業可
以復見于今而狂放易言略不修飾至 今上嗣位
之後又見其英毅果斷益喜自負以爲鄙志當究于

此一時交與之士反覆輕易不檢惟僕言是徇故謾
論譏說略無忌畏日就月將幾踵奇禍幸免殺身而
歸而二三者又補砌所無以爲真有使僕含垢于有
罪者之籍與不肖之人同被驅放上辱兩朝作養之
恩下累先人蠲介之業生平微志付之穢塗情苦心
局不復自愛暇日偶讀皇甫規避梁冀之事與蔡邕
却九錫之書喟然嘆曰彼何獨不得含垢冒汚而成
致美節如此也又偶讀柳宗元傳曰卽宗元有不同
于叔文然親與之交而受其職任矣夫身有規雖之
操而迹厠宗元與九錫之間仁人志士宜于此何如

也今僕所憂者在忽有犬馬之疾死丘壑之下不得伸其夙心原悰耳而區區官秩之事非所念慮也瑾之用事也蓋嘗數以崇秩誘我矣當是時持數千金壽瑾者不能得一級而彼自區區于我我固能談笑而卻之使饕餮巖嶮之人卒不加于我此其心與事亦雄且甚矣當朝大臣蓋皆耳聞目見而孰知其然方臺諫論列之際出于一時倉卒未暇差別而今則又數年矣夫伊尹之輔商也一夫之不獲則曰時予之辜僕卽非賢者然豈少于商之一夫哉大臣者乃忍使之雜于孫聰曹元輩間耶故鄙人之心至此益

放益懶披髮嘯歌至于終身而不敢悔此非甘心爲
長沮桀溺之徒也公之義曰古人內舉不避親時之
可舉不可舉非僕所知也而僕之污穢亦非公應舉
之人觀近臣者以其所爲主于此使識者苟爲之言
則所係于公者豈細哉今僕之不可于當世者有五
而甚不宜出就官秩者有二性喜嫉惡而不能加詳
聞人之惡輒大罵不已今諸公者皆喜明遜而陰譏
此一不可翰林雖皆北面事君而勤渠閣老門下者
以爲賢能僕懶放畏出歲不能一造其戶此二不可
人皆好修飾文詐僞恭假直而僕喜面訐人未有不

怒者此三不可士大夫不務修身立政而俱呻吟詩
文以爲高業見其詩若文不能不怒故見輒有言而
彼方望我以爲美也我以言加之此四不可與相好
者接必因其職事加勉戒之詞多忤其所好彼或未
從卽拒而絕之以此親疎多怨苟復見其所愛者又
不忍不告或又告之彼卽又不從而僕又絕之此五
不可執德不宏不能信之于人雖頗自好而當世談
論之士多加詆謗自入有罪者之籍污穢終身莫能
自潔使平日所立之志局閉淪落智高萬物之上而
名陷九淵之下于中夜竊自嘆悔不當輕易效慕世

俗科舉徇外構此兇溺今又不傲而欲仕乎此甚不
宜出者一時同黜之人固有不幸而被污者然罪大
惡極羞談于婦人女子之口尚十之九彼莫不覬幸
僕出以爲先容之地而當時宰執又率崇私愛而乏
分別苟欲引其私人必援僕爲喻是所以用僕者非
必實知其爲人而真明其有誣也如此則是以賢者
之身而爲不肖者之資矣語有曰君子非其招不往
以不賢人之招招賢人如之何其可往哉今衆人雖
以不肖謂僕而僕未嘗一日不以賢君子自謂已如
此自謂而人以彼謂已蓋所謂嘒爾而與乞人不屑

者也此甚不宜出者二明公之意特出于一時愛念之篤偶未詳究及此然言出乎口通乎心明有日月幽有鬼神此區區平素之惻可一鑒而盡者公如覺之則信其爲肝膈之實慨然憐我體我矣海年八十餘以壽終子栗字子寬亦有異才能詩詞不第早卒

馬應祥

馬應祥字公順西安咸寧人自幼穎異弘治己酉舉鄉試第二人丙辰登進士觀政戶部其年秋犒金甘肅有以羨餘言者叱去秋毫無所苟明年丁巳授河內知縣河內素稱難治庶事一切頽廢租賦至數年

不完至則加意撫循之不率教者治之不妄咎一人
具攷戶數則躬爲編次奸吏滑胥無隙可進自是租
賦完徭役均百廢興詞訟希少豪民斂跡暇則課諸
生手校其課執公庭之上吏縮首重足立視其室服
食器用泊如也明年以母喪歸百姓走送涕泣竟日
乃始別去喪畢改任徽郡歙縣郡考亭故里雖稱文
獻然俗好氣健訟好交結貴人爭地數尺起訟連年
費千百金求勝不勝不止又豪家大族搖動禍福至
則持之以靜事求其可不枉道以徇人久乃自定民
有據險不輸賦者且五十年出榜招之曰不輸賦者

坐以重役示罰于是諸租賦無敢後期至郡有殺人者久不可得先期齋戒禱越國汪公祠下曰神許我得其情則雨是夜果雨翌日啓死者棺事中諸人羅跪乃一鼠自棺出鑽跪者一人衣底尋忽不見私念曰此神示也乃指其人曰殺人者汝其人色動推究果服又郊外殺一人未絕命移之縣大門內許人縱觀之乃一人嗟歎其側者久之因扼其吭遂絕乃執而抵于法益殺大利其財不絕恐或出語故復來扼吭耳於是縣中稱爲神明歌頌之召拜吏部督勳主事丁卯謝文選是時權貴用事旣無干謁亦不矯激

惟蹇然自守旣乃厭棄求歸尚書許公勸留乃止尋
陞稽勲署員外郎與尚書忤陞湖廣按察僉事督學
庚午涖湖廣會當鄉試而湖山闊遠兼之卑濕於是
校定諸士不能徧歷或合數處羣試之場屋事竣方
施教約明年辛未言者以簡出爲辭遂改督屯河南
然鑒別之精予奪之公諸士實心服焉于其去也感
惜之至河南數日復以母喪歸服闋改兵備陳睢在
陳睢一年積贖罪米粟千石及數百金儲諸府庫立
之卷籍以爲官需至于黜貪污之吏革濫稅之關威
令赫然行矣乃乙亥秋有詔罷陳睢兵備帶銜河南

聽用於是浩然而歸吏部檄屯河南尋丁父喪起改
山西督屯是時屯田子粒負欠三四年併徵實難謀
諸撫按許他物相準卽以給諸士卒甫三月完者十
之六七尋擢山西按察副使旣至未久入賀卽上疏
乞休歸里與朋好日游城東飲酒賦詩搜奇抉巧不
驚人不已故平生文章詩所得不多然類非世俗所
能也風流慷慨翛然物表以上壽考終

薛敬之

薛敬之字顯思渭南人居止端嚴動稱古道成化初
應貢入太學值外內艱皆跣行奔訃尺雪不避諸生

咸服其行誼後謁選授應州知州勸農桑崇學校除盜賊奏課第一陞金華府同知撰金華鄉賢志二年致仕歸

張潛

張潛字用昭號東谷華州人生而穎秀甫八歲日記數千言口占詩對答應如流稍長弄筆爲文輒吐奇語侍郎公送之學士西涯李公所從受尚書李公奇之甚嘗語人曰韓退之驚怪張童子不易得也乃今復有之成化丙午秋十有五歲矣西赴鄉試不偶益淬礪自負弘治壬子遂庵楊公督學關中徧試諸生

謂關中有三才子蓋慶陽李獻吉洵陽張光世其一
潛也是秋三人同舉再試禮部丙辰春自禮部入對
太廷俱在高第授戶部山西司主事出納錢穀關節
不通剔抉弊蠹祁寒暑雨無少懈情部尚書稱其廉
能擢員外郎丁外艱服闋改禮部儀制司員外郎未
幾擢精膳司郎中凡 朝廷大宴會及宴勞四夷經
畫節制禮無廢闕費絕侵漁是時劉瑾用事深用避
匿蹤踪不通或曰公鄉人也不往且有禍笑而不答
其卓立如此已巳冬擢廣平府知府廣平附畿內三
四年來權奸肆虐民不堪命盜起流劫郡邑不可撲

減多方捍禦郡中賴以無事旣乃按行屬邑撫循安輯之省其財力均其徭賦黜舞文之吏清久滯之獄申庠序之教興禮讓之俗郡邑熙然治矣逾五年癸酉起擢山東左叅政是時工部尚書無錫秦公爲布政使相得甚歡凡旬宣督餉之務相與諮議而後行人方冀其大有爲也乃明年遭誣中以察典浩然西歸曰自求無歎而已潛風流蘊籍善吟咏工書華州山水佳勝足以自娛又常徃來武功與康先生游對客命酒談論古今時出雅謔聽者灑然如臨皓月沐清風鄙吝頓消弗自覺也

尚衡

尚衡字一中同州人也四歲能誦古詩十七授尚書
爲州學弟子二十而孤三十八舉於鄉後舉進士拜
工科給事中嘗出關山海關諸路邊餉邊人誦焉乾
清宮災上封事十二條 敬皇帝下詔求直言乃復
上四事尋又奉詔陳四事其後 天子作延壽宮又
釐兩宮又上封事其辭曰臣聞大德必壽建塔延壽
無是理也陛下初卽位誅戮妖僧罷法王去佛子此
盛德也臣愚以爲事旣惡於昔必不好於今定有左
石之人希恩信怪妄傳神異誑惑 聖聽故至此覽

奏爲罷其役戶部尚書侶鍾其子受賕事覺乃劾罷
鍾遷吏科右給事中未幾遷戶科左給事中出閱大
同諸路邊餉是時虜大舉入寇上命保國公朱輔
都御史史琳率衆數千人擊之師久無功於是劾奏
焉以忤當路遷浙江左叅議浙俗健訟日受數百牒
剖汰如流連歲大饑賑貸活數千人嘗入賀萬壽聖
節會劉瑾瑾惡人高憤或勸其勿高憤者不聽其自
立類如此遷浙江左叅政復改山西分蒞河東道居
平陽平陽多藩邸其下多馮藉以攘取民下車禁止
盜王常聚衆西山設計擒殺常散其餘黨後乃移守

冀寧道道在省城財殫事倍又遊民蕩子侮法敗風
會流賊入寇河東薄太原甚急當是時城中官軍先
已守備澤潞諸寮城守人當一門衡獨在南門南門
者盜衝也乃移檄指揮賈彪設伏盤馱坂下賊由是
懼走入冀南跨馬欲追擊之然無兵不果會官軍歸
自澤潞受臺檄卽往追賊賊聞乃自壺關遁去巡按
御史素不善劾以玩盜宜寘於理衡亦奏書訟寃然
竟左遷漢陽至漢陽旬日疽發背卒

郭桂

郭桂字時芳咸寧縣人二十六舉鄉試三十三舉進

士爲知縣安丘安丘民王愷者富而橫令至啖之以利旣乃鉗制不得動令心內忿然無可奈何至是愷使人逆桂以利啖之拒不可怒斥之去至縣而愷自來謁乃發其事鞭笞之愷懼謀陰中以禍以罪擒殺之有訟其子盜金者且罵母桂知其後母也而謂翁曰亟歸發媼衣笥中可得金果得之于是翁大感悟知其媼爲之也乃復愛其子嘗趨郡謁郡大夫縣中囚乘隙反獄走匿不可得攝縣者懼追告之途曰常在其地古墳坎窞中果然其他政事明斷多類此遷湖州府通判督糧儲往未有能自拔超遷去者蓋多

以賄敗而桂獨以廉又綜理周密能祛其宿弊人莫敢犯之儲運輒先期完稱爲能遷爲泰州知州州有三虎曰鄧仁蘇容祁清桂至而鄧仁祁清以姦事發覺死蘇容獨存有以爲言者曰姑待其自至一日姦事發覺至州門曰死矣曰死瘞州門下瘞之三日出屍出屍乃死然其初實詐不死也其待惡戾民如此至于民則惟恐其或傷之于是州中遠近歌頌相戒不敢爲惡恐犯教如三虎死居無何轉鎮江府同知始人見其理戎務也老吏猾胥斂手縮項弊端塞絕然不知其他嘗攝郡事理詞訟決疑獄而人乃更屈

服翕然稱之惟恐不爲郡守其後遷爲開封郡守鎮
江之人無不咨嗟嘆息惜其去欲挽留之不可得也
至開封旬日會母喪以歸歸未久而父亦卒喪畢起
復爲平陽平陽山西大郡轄州縣多而是時海內多
事盜賊起百姓凋弊又多藩邸下人桂至多方撫輯
百姓安堵久之而衣食足歌頌興焉于是新堯廟增
修舜禹廟煥然改觀戶部尚書韓公文洪洞人也年
八十餘家居賓客非其人不與見也乃安車入平陽
謁謝而曰老人無所求強爲百姓一行未久擢叅政
去以無病而卒得年五十九歲

王納誨

王納誨字獻可別號蒙谿其先幽人後徙長安爲長安人生有殊質父司教延津誨從侍肄學不擇昏旦凡諸經史子籍無不遍覽掇要不爲世俗學也學成歸試補弟子員弘治壬子中鄉試三試禮部不第乃遊國學友名流談古道博綜羣籍旁達世故一時無出其前者壬戌登進士宰相素知其人臨清河渠爲天下要衝而挽夫舟人叢集爲姦公私病之故授工部主事行部治閘事旣治閘乃爲立條章嚴約束時啓閉謹蓄泄閘事井井無不頌其便正德丙寅秩滿

獻績調吏部考功司主事戊辰晉員外郎己巳再晉
驗封司郎中於是翻閱往牘悉復舊章自侯伯以下
皆令庭叅而考課覈驗特嚴以公倖路塞絕請託抑
沮諸以事至部者咸嚴憚之由是覈積於人庚午竟
以時宰之故波及左謫易州同知在易奮勵自樹不
以外內奪志時巨盜流劫畿輔間畿輔郡縣城郭多
不完總制都御史幸庵彭公檄督修匝月以完報又
令料理軍實軍實乃充壬申晉河南按察司僉事理
屯河南寇亂之後屯多荒蕪乃爲反侵占給牛種時
征斂減加耗杜侵漁三年屯政底績時郡有豪黠附

權武斷析人肢體官司坐視三年莫能執執豪伏法
郡獄繫囚多至千數按牒剖決不三日獄幾空虛河
南民凡有獄訟咸願赴之爲語曰神明神明云乙亥
丁丑父母後先卒凡居憂五年巳卯復除河南僉事
兵備信陽會革不果行改四川按察司僉事兵備敘
瀘敘瀘邇夷務以懷遠固封宣威敷澤爲首務人人
稱父母嘉靖壬午晉副使分司川西川北其巡兩川
也風裁肅然貪墨解紱接踵去乃遇事直身當擔有
不便民者悉罷除之雖拂巨室怒長官忤寮吏皆不
之忌人或謂曰盍自圖笑不應事事如故其區處兩

川事宜凡數百爲書凡十帙舉切時政無長冗言于是兩川爲改觀也復中策言遠移雲南兵備臨安治臨安猶治敘瀘乙酉量移山西尋晉山西布政司右叅政由滇之晉道出故里遂卧病而卒性剛大不阿而心獨誠厚事父母極其歡心居喪盡禮其處宗黨恩禮次序秩秩如也志在天下毅然不遜有古人負荷之勇且魁岸獨峙不伍塵俗乃又好面折人人不合輒麾去不與語故庸人或少之而達士尊焉至其奮迅防禦之才堅固不渝之操洞朗旁達之識邃古玄秘之學固一時之鮮匹也

張璉

張璉耀州人不畏強禦巡按湖廣時有貴臣子橫於鄉守臣不敢問璉奏論如法武廟駐蹕大原有儀賓坐殺人繫獄者賂江彬丐免彬矯詔赦之璉曰天顏咫尺憲臣不親奉詔旨孰敢信儀賓竟不免人以是多之歷官戶部侍郎卒於官賜祭葬如例

王承裕

王承裕西安府人弘治癸丑進士選授兵科給事中歷吏科都給事中以言事觸逆瑾罰粟輸邊尋以父喪去位服闋除原官累陞戶部右侍郎提督倉場南

戶部尚書致仕卒承裕潔廉好學孝友端慎卓有
父風士林重之

徐璉

徐璉字宗獻朝邑縣人弘治己未進士授戶部管倉
監稅總理遼東儲特所蒞有能聲出守袁州正德中
宸濠構逆刃刼守臣稱兵趣留都以窺神器大中丞
陽明王公首倡義師璉聞變謁王公於吉郡歸聚得
兵五千人從下豫章破之濠攻皖城不下謀知豫章
破卽返旆遇兵黃家渡邢擊其左璉與戴出其右賊
衆奔散濠就擒江土以寧方戰不食者二日不解甲

者四日獲賊級一千二十八名顆疏功與伍邢戴爲
第一逾年僅晉左叅無何叙功議陞二級爲左使歸
候缺又逾年而致政之命下矣退居善自韜晦絕口
不言功日吟詠爲樂文典縟詩調高古不作濃艷語
所著有玉峰集十五卷編群書纂要一百九十六卷
享年七十有七

李紀

李紀字維之興平縣人弘治十一年舉人由祥符知
縣選雲南道御史以劾劉瑾謫陳留知縣八年陞寧
朔知州累陞山東僉事致仕

東郊

東郊字希宋華州人正德六年進士由平陽府推官選浙江道御史巡按蘇松以劾江彬降潞州判官後以原官致仕

郭田

郭田字汝耕長安人正德九年進士知嘉善性簡直政令畫一堅持冰蘖操人有饋遺輒峻拒每見解銀指謂左右曰此阿堵物能亡身敗家爾等毋爲所汙時有生員朱愚上書陳其過卽榜之縣門引以自罪後歷陞布政司叅議致仕今猶頌其廉明云

朱騁

朱騁字安國三原縣人進士由行人選浙江道御史
巡倉丁憂復除本道建言廷杖降丹徒知縣陞南戶
部主事累陞四川副使致仕